

HEDABIDEAK. Tolosaldean gehien irakurtzen den komunikabidea da, baita gaztelaniazkoak kontuan hartuta ere

Lehen urtea bete du 'Egunero'-k, herritarren artean gero eta sendoago

7.000 ale banatzen dituzte egunero Tolosaldeko 28 herrietan

Eider Goenaga | DONOSTIA

Gaur beteko da urtebete *Tolosaldean Egunero* egunkariak lehen alea argitaratu zuenetik. Geroztik, bailarako egunkaria sendotuz joan da herritarren artean, eta Tolosaldeko 28 herrietan erreferentzia gisa dute *Egunero*. Izan ere, bailaran gehien banatu eta irakurtzen den egunkaria da egun, baita gaztelaniaz kaleratzen diren idatzizko komunikabideak kontuan hartuta ere. Iazko abendura arte, *El Diario Vasco* egunkariak banatzen zuen ale gehien, eta *Egunero*-k ia bikoiztu egin du kopuru hori.

Iazko udan abiatu zuten proiektua EUSKALDUNON EGUNKARIAK eta Galtzaundi Euskara Elkarteak; bi horiek dira, gizarte eragileek osatutako beste akziozko talde batekin batera, *Tolosaldean Egunero*-ren sustatzaileak. Tolosaldeko Komunikabideak SL enpresa sortu zuten proiektua garatzeko; horretan, EGUNKARIAK %40 dauka, Galtzaundi Euskara Elkarteak %30, eta gizarte eragileek beste %30.

DATUAK

Zortzi orri. Zortzi orrialde ditu *Tolosaldean Egunero*-k, eta, normalean, azpibailara bakoitzak orrialde bat hartzen du.

Astelehenetan izan ezik. Astelehenetan ez beste egun guztietan banatzen dute, etxez etxe.

7.000 etxe eta 24.000 irakurle. Goizero 7.000 ale banatzen dituzte, etxeetako gutunontzietan, harpidetza bidez (urtean 40 euro). Guztira 24.000 irakurle inguru ditu.

Sostengu zabala. 300 irakurleri egindako galdeketa baten emaitzak argi eta garbi azaldu zuen *Egunero*-k herritarren artean zuen harrera ona. %96,7k on edo oso on iritzi zioten egunkariari.

Tolosaldeko 28 herrietako informazioa lantzen dute, eta egunero azpibailara bakoitzak bere lekua izaten du —orrialde

bat bakoitzak—. Astelehenetan ez beste egun guztietan banatzen dute, hala eskatu duten etxeetako gutunontzietan. 7.000 etxetan jasotzen dute herri informazioa lantzen duen egunkari hori, eta 24.000 irakurle inguru ditu.

Banatzaila sare propioa du *Egunero*-k, eta herriguneetatik urrunen dauden auzo eta baserrietara ogi banatzaileen bitartez iristen da. Proiektua pixkanaka sendotuz joan da, herritarren artean erreferente informatiboa bilakatu arte.

%60ko autofinantzaketa

Egunero-ren finantzaketaren %60 autofinantzaketa bidez egiten da; publizitatearen eta harpidedunek emandako diruaren bidez. Gainerakoa, berriz, diru laguntza publikoekin finantzatzen da. Bailarako 28 herrietako udal gehienek eman diote diru laguntza euskarazko hedabide horri; baina diru laguntzak lortzeko arazorik ere izan da.

Villabona, Asteasu eta Alegia dira diru laguntzarik eman ez duten udalak; Tolosakoak, berriz, orain dela hilabete erabaki



EGUNERO

Tolosaldean Egunero izan zen igandean Olanori egindako omenaldiaren hiru sustatzaileetako bat.

zuen *Egunero* diruz laguntzea. Tolosan Batasunak du alkate-tza, baina ez du gehiengo osorik; beraz, EAJk iritzia aldatzea behar izan zuten *Egunero*-rentzat diru sail bat bideratu ahal izateko. 48.000 euro inguru jasoko ditu *Egunero*-k Tolosako Udaletik.

Bestalde, Eusko Jaurlaritzak oraindik ez du jakinarazi euskarazko hedabideen diru lagun-

tzen inguruko behin betiko erabakia, baina laguntza jasotzea espero dute.

Urteurrena dela eta, hainbat ekitaldi antolatu dituzte Tolosaldean. Gaur, urteurren ospakizuna egingo dute Tolosako Kultur Etxean, 19:30ean; urteurrenaren harira, *Egunero* izan zen igandean Abraham Olanori egindako omenaldiaren sustatzaileetako bat.

JOXEMI SAIZAR 'EGUNERO'-KO ZUZENDARIA

«Bailarako herritarren artean erreferentzia informatiboa bilakatu gara»

E.G. | DONOSTIA

Joxemi Saizarrekin hitz egin du EGUNKARIAK, eta *Egunero*-ko zuzendariak lehen urteurreneko balorazioa egin du. Proiektua herritarren artean erreferente bilakatu dela dio.

■ Lehen urtea bete du Tolosaldean Egunero-k. Zein da egiten duzuen balorazioa?

Hasieran, esperientzia aitzindaria izan zen; beste inon ez zegoen halakorik. Erronka izan zen hasieratik, eta gaur, urtebete pasatuta, ikusi dugu hasieran jarritako helburuak betetzen direla. Herritarren artean oso onarpen ona izan du, eta posible izan da egunero

Tolosaldeko informazioarekin euskaraz zortzi orri betetzea; beraz, alde horretatik, pozik eta gustura gaude, *Egunero* bailarako herritarren artean erreferentzia informatiboa bihurtu dela uste baitugu.

■ Arazoak izan dituzue erakundearen diru laguntzak jasotzeko. Zer iruditu zaizue herritarrek —diru bilketan eta atxikimenduen bidez— eman duten erantzuna?

Ekain inguruan, eskualdeko udal handienek —Tolosa, Villabona eta Alegia— eta Diputazioak ezezkoa eman ziguten. Beraz, kanpaina abiatu genuen, *Egunero*-ren laguntzaile figurarekin. Irakurleei



EGUNKARIA

egindako deiekin gehiengo handi baten laguntza eskuratu genuen. Horrek indar handia eman zigun, ekonomi aldetik zein moral aldetik. Gainera, Tolosan diru laguntzen afera desblokeatzeko ere balio izan du. Izan ere, Tolosako EAJ ere laguntza ematearen alde agertu da, eta, oraindik ziurra ez bada ere, Eusko Jaurlaritza-

ren laguntza jasotzea ere espero dugu.

■ Ekonomikoki laguntzeaz gain, nola ikusten duzue Tolosako Udalak Egunero laguntzeko hartu erabakia?

Tolosako EAJk erabakia aldatzeak babes zabalagoa ematen dio proiektuari; gainera, Tolosa da bailarako herri handiena. Garrantzi bikoitza du.

■ Zeintzuk dira 2003rako erronkak?

Igandean diseinu berria atera genuen, eta hori finkatzea da lehen helburua. Bestetik, bihar [gaur] urtekaria kaleratuko dugu, egunerokoari 16 orri gehiturik. Aurrera begira, berriz, egunkaria sendotzen jarraitzea da gure asmoa; gai berriak bilatu, jendearekiko hurbiltasuna landu, web orriaren bidez parte hartzea sustatu...

■ Hasieran, doan banatu zen bailarako etxe guztietan; gero, eskatzen zutenei banatzen hasi zineten, doako harpidetza bidez. Eskae-rek gora egin dute?

Hasieran, 13.000 ale banatzen genituen, jendeak produktua ezagut zezan; gero, 7.000 lagun inguruk egin zuten eskaera, eta horretan finkatu da kopurua. Agian hori izan daiteke datorren urterako erronketa-k bat, irakurle kopurua pixkanaka handituz joatea.